



Innuttaasut tarnimikkut napparsimasut innuttaasut akornanni inooqataaqqilertarnerannut annertusaanissaq anguniarlugu tarnikkut nappaatilinnut immikkoortortaarfik aammalu pinerluttunik isumaginnittoqarfimmi sulisut ilinniakkamik qaffassaaqqiffiginnaasaannik immikkut suliaqarnissaq siunertaralugu Naalackersuisut sukkanerpaamik Rigsmyndighed-mut attaveqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatinit Inatsisartunut Ilaasortamut Anna Wangenheim-imut siunnersuummut pitsaasumut.

Demokraatit Anna Wangenheim isumaqatigaat oqarmat, maani nunatsinni pinerlussimasut tarnikkut nappaatillit sullinneqarnerisa pitsanngorsarnissaat iliuuseqarfigisariaqartoq. Ajoraluartumik suli takusarparput, amerlavallaat meeqqanut naapertuilluannngitsuliortartut. Amerlavallaat arnanut naapertuilluannngitsuliortartut. Toqutsinerit toqutseriaraluarnerillu amerlavallaarput. Imminnut toquttut amerlavallaarput.

Tamakku ersarissumik uppernarsaataapput, Anna Wangenheim-i ilumoortoq, isumaqarami, tarnimikkut napparsimasut eqqartuussivimmit katsorsagassanngortitanik sullissineq pitsanngorsartariaqartoq. Iliuuseqarnissaq pingaaruteqarluinnarpoq.

Uani siunnersuummi pineqarpoq ilinniakkanik qaffassaaqqinnissanik aallartitsisoqartariaqartoq, tarnikkut nappaatillnik sullissisut pinerluttunillu isumaginnittoqarfimmi sulisut piginnaasaasa qaffassarnissaat una siunertaralugu, innuttaasut tarnimikkut napparsimasut eqqartuussivimmit katsorsagassanngortitaaasut amerlanerit inuiaqatigiinnut akuulerseqqinnissaat taamatullu naapertuilluannngitsulioqqinnginnissaat nutaanillu pinerluuteqannginnissaat anguniarlugu.

Demokraatit pingaartut isigaat, sammisamut aningaasanik atuisoqarnissaa, suliniutit eqqortut meeqqanut naapertuilluannngitsuliornernut pinngitsoortitsisinnaappata, aningaasat eqqortumik atorneqassammata. Naapertuilluannngitsuliornarit pinaveersaartinnissaannut pitsaanerullutalu pitsaanerulertariaqarpugut.

Naalackersuisut allannguutissatut siunnersuuteqarput, suliap paamaarunneqarnissaanik siunertaqartumik. Naalackersuisut siunnersuuteqarput, tassunga taarsiullugu pilersaarusiortoqassasoq tarnimikkut napparsimasut eqqartuussivimmit katsorsagassanngortinneqarsimasut inuiaqatigiinnut akuulerseqqinnissaannut unamminarsinnaasut aporfiiillu misissorneqassasut aammalu suliniutissanut aalajangersimasunillu iliuuseqarnissanut siunnersuusiorlutik. Taakku ukiaanerani 2024 saqqummiunneqassapput – tassa ukiut marluk qaangiuppata.



Toqqaannaq oqaatigalugu; Anna Wangenheim suliarilluakkamik siunnersuuteqarpoq, maannakkorluinnaq iliuuseqarnermik kinguneqartussamik. Tamanna pitsaanerpaavoq ukiut marluk utaqqinermi. Ima oqanngilanga, Naalackersuisut allannguutissatut siunnersuutaat pitsaanngitsuusoq – tamanna aallartinneqarluarsinnaavoq Anna Wangenheim-ip siunnersuutaata saniatigut, kisiannili taartitit ingerlanneqartariaqanngilaq.

Taamatut oqaaseqaatilerlugu Anna Wangenheim-imit siunnersuutip akuerineqarnissaa innersuussutigineqarpoq ataatsimiititaliamilu susassaqartumi suliareqqineqarnissaa innersuussutigalugu.